

بِسْمِ اللَّهِ الرَّحْمَنِ الرَّحِيمِ

POTICAJNA LJUBAV KOJU DARIVA UZVIŠENI ALLAH

فِيمَا رَحْمَةً مِّنَ اللَّهِ لَئِن تَهُمَّ وَلَوْ كُنْتَ فَظًا غَلِيظَ الْقَلْبِ لَأَنَّفُضُوا مِنْ حَوْلِكَ فَاعْفُ عَنْهُمْ وَاسْتَغْفِرْ لَهُمْ وَشَاوِرْهُمْ فِي الْأَمْرِ فَإِذَا عَزَمْتَ فَتَوَكَّلْ عَلَى اللَّهِ إِنَّ اللَّهَ يُحِبُّ الْمُتَوَكِّلِينَ. (سورة آل عمران: 159)

**"Samo Allahovom milošću ti si blag prema njima; a da si osoran i grub, razbjegli bi se iz tvoje blizine. Zato im praštaj i moli da im bude oprošteno i dogovaraj se s njima. A kada se odlučiš, onda se pouzdaj u Allaha, jer Allah zaista voli one koji se uzdaju u Njega."** (Kur'an, 3:159)

U ovome danu prve džume u Reibu-l-evvelu 1441. H. godine, otvara se tema o posljednjem Allahovom Poslaniku, Muhammedu, a.s. Tradicija muslimana je ukrašena različitim sadržajima ibadeta kojim se sjećaju odabranog među ljudima da sa poslaničkom misijom bude MILOST cijelom svijetu. (K, 21:107)

Okrilje milosti Uzvišenog Allaha obuhvata cijeli svijet koji je ispunjen ljubavlju i pažnjom. **"Uzvišeni Allah je pun ljubavi..."** (K, 85:14<sup>1</sup>) koju dariva ljudskom rodu, plemenitom Poslaniku, a.s., njegovoj porodici (Ehli Bejt) i Ummetu za koji objavljuje: **"Vi ste najbolji Ummet..."** (K, 3:110). To je zajednica koju oplemenjuje Muhammed, a.s., svojom poslaničkom misijom sa kojom temelji brižnost, širi ljubav, razvija toplinu iskrenih odnosa i promovira brojne vrline koje razboriti ljudi mogu i trebaju koristiti na vlastitoj životnoj putanji. Objavljeni ajet: **"...ti si blag prema njima; a da si osoran i grub, razbjegli bi se iz tvoje blizine.."** (K, 3:159) skreće pažnju na posebnost Časnog Poslanika, a.s., koji svoj Ummet spominje u činu rađanja (Mevlud): *Moj ummet, moj ummet...* (أمتي، أمتي...), koji ne zaboravlja podijeliti zadovoljstvo ushićenja Mi'radža sa svojim Ummetom: *„Neka je mir i Allahov blagoslov na sve nas i na čestite koji dobra djela rade..."* Poslanik, a.s., koji u rastanku sa ovim svijetom ostavlja oporuku i uči dovu Uzvišenom Allahu: *"Gospodaru, moj ummet, moj ummet!"*, a onda je zaplakao. Uzvišeni Allah tada reče Džibrilu: **"Otiđi kod Muhammeda i upitaj ga šta ga je rasplakalo, a tvoj Gospodar to najbolje zna."** Džibril, a.s., je otišao kod Muhammeda, a.s., i upitao ga zbog čega plače, a on mu je ispričao da se brine za svoj ummet, a Allah svakako najbolje zna šta je on rekao. Tada je Svevišnji Allah kazao Džibrilu: **"Otiđi kod Muhammeda i reci mu da ćemo ga u pogledu njegovog Ummeta učiniti zadovoljnim, a ne žalosnim i nesretnim."** (Muslim)

To je Poslanik, a.s., koji je saosjećao iskušenja svoga Ummeta: **"Došao vam je Poslanik, jedan od vas, teško mu je što ćete na muke udariti, jedva čeka da Pravim putem pođete, a prema vjernicima je blag i milostiv."** (K, 9:128<sup>2</sup>) Pažnja, briga, milosrđe i druge brojne vrline su ukrasi Muhammeda, a.s., koje promovira u dunjalučkoj misiji. Roditeljska pažnja prema potomstvu može naći ugodan napitak na izvoru vrlina koje je utemeljio i razvijao u svome Ummetu Allahov Poslanik, Muhammed, a.s.

Muhammed, a.s., je utemeljio i pokazao kako se brine o zajednici, narodu, porodici i potomstvu. Brojne su činjenice zabilježene u SIRI, životopisu Allahova Poslanika, a.s., koji to traži od lidera kada zauzimaju mjesto vođe, to očekuje od roditelja kada ih Uzvišeni Allah počasti potomstvom.

Briga o narodu/podanicima i potomstvu je stalna obaveza. U djetinjstvu odgovorni roditelji brinu o zdravlju djeteta, u mladosti podstiču na učenje, a u zrelosti na rad. Na takvoj

<sup>1</sup> وَهُوَ الْعَفْوَ الْوَدُودُ. (سورة البروج: 14)

<sup>2</sup> لَقَدْ جَاءَكُمْ رَسُولٌ مِّنْ أَنْفُسِكُمْ عَزِيزٌ عَلَيْهِ مَا عَنِتُّمْ حَرِيصٌ عَلَيْكُمْ بِالْمُؤْمِنِينَ رَؤُوفٌ رَّحِيمٌ. (سورة التوبة: 129)

životnoj stazi treba pokazati vrlinu odgoja iz djetinjstva, kulturu ponašanja iz učenja i fizičke sposobnosti za rad i sticanje halal zarade. To je mudrost života u okrilju Milosti Uzvišenog Allaha i brižnosti Njegovog Časnog Poslanika, a.s.

Neodgovorno roditeljstvo zanemaruje brigu o zdravlju potomaka. Ukazano je na problem u ovoj generaciji i na ovom prostoru da određene osobe vode kampanju protiv vakcinisanja beba. To je opasno, nezrelo i neodgovorno. Zdravlje djece i obaveza vakcinisanja je briga roditelja i odgovornih u društvu! To se ne smije potcijeniti kao ni pojava samoranjavanja djece, učenika u osnovnim školama. Roditelji i odgovorni u društvenoj strukturi su dužni aktivno se uključiti u sprečavanje nastranih pojava. Poziv Uzvišenog Allaha: "**O vjernici, brinite se o sebi....**" (K, 5:105<sup>3</sup>), odnosno: "**O vjernici, pokoravajte se Allahu i pokoravajte se Poslaniku, i ne ništite djela svoja!**" (K, 47:33<sup>4</sup>) Ne ubijajte svoje potomstvo neodgovornošću! Dakle, Poslanik, a.s., je utemeljio brižnost u svome Ummetu i to očekuje od roditelja u brizi o potomstvu. Dakle: „**Ne gubite nadu u Allahovu milost, samo nevjernici gube nadu u Allahovu milost.**“ (K, 12:87) To je poticajna ljubav koja može i treba da rađa djecu i brine o zdravlju potomaka! Zato treba kazati da je čestitima dužnost da obrazuje mladost i širi znanje. To je garancija svijetle budućnosti!

Radite poslove koje volite koristeći resurse u sebi i oko sebe, bićete dostojanstveni i neovisni o drugima!!

Neka su vam mubarek DANI MEVLUDA!

Sarajevo, 01. novembar 2019. godine

---

<sup>3</sup> يَا أَيُّهَا الَّذِينَ ءَامَنُوا عَلَيْكُمْ أَنْفُسَكُمْ لَا يَضُرُّكُمْ مَن ضَلَّ إِذَا اهْتَدَيْتُمْ إِلَى اللَّهِ مَرْجِعُكُمْ جَمِيعًا فِيمَا كُنْتُمْ تَعْمَلُونَ. (سورة المائدة:105)

<sup>4</sup> يَا أَيُّهَا الَّذِينَ ءَامَنُوا أَطِيعُوا اللَّهَ وَأَطِيعُوا الرَّسُولَ وَلَا تُبْطِلُوا أَعْمَالَكُمْ. (سورة محمد: 33)